

明 瞿九思著

(國學文庫 參拾八編)

萬曆武功錄
中三邊一·二

總發售處

北平隆福寺街 文殿閣書莊

萬曆武功錄卷之七

翰林院添註待詔王瞿九思著

中三邊

俺答列傳上

順義王俺答。阿著子也。或言謬阿郎子。三代以上。有熏鬻山戎。淳維。獫狁。秦漢匈奴。唐突厥。宋契丹。皆居於北邊。隨草畜牧而轉移。其畜之所多。則馬牛羊。其奇畜。則橐駝。驢。羸。馱。騾。駒。駢。驪。無城郭。常居耕田之業。以革作帳。然今已習屋居。有文書。類獸篆。所奏皆從左而右。兒能騎羊。引弓射鳥鼠。少長則射狐兔肉食。土力能彎弓。盡爲甲騎。其俗喜盜好殺。輕生嗜利。刻木封箭爲信。寬則隨畜田獵禽獸爲生。急則人習戰攻以侵伐。其天性也。其長兵則弓矢。短兵則刀鋌。挾弓馬長技。上下山谷閒。往來聚散。倏忽如風雨。饑渴不倦。自君王以下。咸

食畜肉。衣其皮革。被旃裘。壯者食肥美。老者飲食其餘。貴壯健。賤老弱。父死。妻其後母。兄弟死。皆取其妻妻之。有名不諱而無字。大略猶有匈奴風。漢時匈奴最强大。而烏桓亦盛。漢末爲鮮卑所滅。鮮卑衰。而蠕蠕强大。與魏爲敵。蠕蠕滅。而突厥起。盡有西北地。唐李靖滅之。後五代以及宋。契丹爲盛。後女真滅契丹。於是侵中國。遂僭帝號。號金。其所部蒙古。泰赤烏。塔塔兒。克列。亦各有分地。後蒙古又并諸部。滅女真及宋。國號元。按元之先。蒼色狼與慘白鹿配。度騰吉思水。至斡難河源。不兒罕山。生巴塔赤罕。巴塔赤罕。生塔馬察。至十二世。日孛端察兒始大。先是。日孛端察兒之母。阿蘭果火。寡居。夜寢。有明光照腹。果生日。孛端察兒。日孛端察兒。生也速亥。也速亥。生鐵木真。以孛兒赤斤爲姓。久之。也速亥死。會鐵木真幼。其部曲多散歸它部。泰赤烏。泰赤烏遂合七部諸精兵。攻鐵木真。鐵木真亦與其母月輪。率部曲爲十三翼。大擊泰赤烏破之。於是諸部曲

皆嘆曰。鐵木眞。衣人以衣。乘人以馬。吾當歸之。由此赤烏遂微。鐵木眞益盛。是時金塔塔兒亦叛。鐵木眞率眾從金師討平之。授木眞察兀禿魯。察兀禿魯。猶漢言招討使也。自是之後。鐵木眞復破乃蠻太陽罕。而部曲多相率來降。鐵木眞黨於是稱強矣。明年。遂攻西夏。破力吉里寨。經落思城。大略而還。益大會諸酋長幹難河。建九旒白旗。自稱吉思可汗。爲元太祖居沙漠。凡四世。有五十七年。然後傳忽必烈。始遷都燕京。爲世祖。歷十四帝。於是元百六十三載矣。而高皇帝卽位。遂元順帝。走應昌。旣三年崩。愛猷識里達剌嗣。十一年。愛猷識里達剌崩。脫古思帖木兒嗣。虜所推爲可汗。而漢所封爲崇禮侯。買的利八剌矣。其二十一年。藍玉出大寧。破虜於古慶州北。脫古思帖木兒遂走。獲其子地保奴。於是部夷也速迭兒窺隙。遂弑之。頃胡中立坤帖木兒。始去帝號。稱可汗。而猛哥帖木兒最倔強。亦立爲瓦剌王。然爲韃靼部酋。非其種也。而瓦剌地。在甘涼。

外邊北山。是時知院捏怯來。丞相失烈門。國公老撒等。皆擅兵。可汗弗能制。其二十二年秋。捏怯來部款塞。請歸降稱臣。其二十五年。上遣周興等。擊也速迭兒。聲其弑君之罪。破走之。其後。大酋脫列干等款塞。而可汗及猛哥。送款北平。佐兵。頃之。坤帖木兒死。鬼力赤嗣。鬼力赤。雖非元苗裔乎。然自順帝至鬼力赤。已七世矣。以故部曲多叛者。賴太保阿魯台。知院阿魯帖木兒。太尉乃兒不花。撫緝其眾。得不亂。而太師右丞相馬兒台。哈咱。太傅右丞相也孫台。及瓦剌。又皆本兵柄。稱強。不受可汗約。甚亡可柰何。是歲建文三年也。其明年。文皇帝新卽位。使使者風諭韃靼。可汗鬼力赤。得通貢。久不報。而會可汗阿魯台。與瓦剌馬哈木。相攻殺。是年。馬哈木。阿魯台。竝入貢。其四年春。上復賜韃靼。可汗鬼力赤。書。復不報。其五年。上有詔。讓阿魯台。其六年。阿魯台。求得蒙古宗人本雅失里迎歸。於是殺鬼力赤。而立本雅失里。其明年春。上遣給諫郭驥。往諭虜。

殺驥。不報。其五月。瓦剌三酋馬哈木等。不附阿魯台。且莫相攻殺。因俛首係頸獻見上。願委質爲藩臣。世共貢職。上以虜殺我行人故。遂受三酋降。詔封瓦剌馬哈木。順寧王。太平。賢義王。把禿孛羅。安義王。於是賜印綬。俾撓本雅失里。其明年七月。遣淇國公福。將五將軍出塞。擊之。尙書夏原吉議。以爲師出塞遠。餉難。請用武剛車三萬輛。大率轉餉二十萬石。踵軍行十日。請築一城貯之。又十日。築城亦如之。上曰善。於是名所築城曰殺胡。曰平胡。居頃之。果敗阿魯台諸將丘福等於臚胸河。其明年三月。上親勒兵十萬。發京師。大閱於鳴鑾鎮。出塞。至清水原。地鹹鹵。水泉不可食。軍苦渴。上默禱。而泉沛出。賜名神應泉。其四月。次灤海。其五月。至斡難河。斡難河者。元太祖始興地也。本雅失里率衆戰。大敗。遂引去。是時阿魯台請降。并欲得女直諸番內屬。廷臣皆以爲便。可施行。獨學士黃淮。以爲虜狼子野心。散則易制。得併爲一。則勢專難圖。上甚善之。乃不許。

乎。大破於靜虜鎮。勒石玄石坡。禽胡山。清泉流而還。先是士饑。上以大官所儲。給三軍。軍食已。乃食。次開平。張宴。大酺將士。士酺已。乃肉食。其親愛士卒。類如此。居歲餘。瓦剌馬哈木。殺本雅失里。立答里巴。其明年七月。阿魯台與瓦剌相仇殺。窮蹙南保塞。乞降。請討馬哈木。上受之。詔封阿魯台爲和寧王。母若妻封夫人。是後瓦剌以和寧王故。朝貢不至。數犯邊。其明年三月。上自將兵征瓦剌。待邊。其六月。至撒里哈兒。與馬哈木。太平。孛羅逢戰。擊破之。追亡逐北。至土刺河。瓦剌逐。上乃班師。是時阿魯台稱病。遣使請行在所。其明年十一月。瓦剌馬哈木貢馬。請死罪。居歲餘。馬哈木死。子脫歡嗣。其二十年春。阿魯台結兀良哈叛去。寇興和。上親征。類于上帝。告于宗廟社稷。廟明。輒承天門。憑居庸北山川。告旂纛。太歲。風師。雷師。雨師。又四日。至鷄鳴山。阿魯台大懼。盡棄其輜重於闊灣海旁。遁去。我軍捕其牛畜而還。其五月五日。上復親征。宴羣臣。丁卯大閱。御

製平胡三曲。俾將士咸詠歌。庚午召列侯騎射。辛未發隰寧北征。擊阿魯台。破之。遂擊兀良哈。蕩其巢而還。是時阿魯台弑其主本雅失里而自立。本雅失里妻率其妻若子來朝。其二十一年夏。阿魯台爲脫歡所敗。人畜殆盡。其秋。上親征阿魯台。其九月。駕次沙城。知院阿先等來降。其十月。次土莊堡。韃靼王子也先土干等來降。上大說。賜也先土干姓名金忠。封忠勇王。時故元苗裔。爲馬哈木。阿魯台所殺。修殆盡。金忠。或言本雅失里子。或言答里巴子。或言答里巴弟之子。其十一月還歸。久之。虜降將屢告。阿魯台弑主虐人。違天逆命。當誅。願捐軀爲士卒先。上曰。而休矣。兵數動。卽朕猶厭之。況下人乎。吾欲自戢也。金忠曰。如邊人荼毒何。上曰。卿意故善。然事須有名。漢文帝言漢過不自先。姑待之。其明年。開平將奏。虜竊入。數盜邊。請討之。其四月。上親征。道應昌。阿魯台遁走。其六月。次答蘭納木兒河。弗見一虜而還。是夜。上夢神爲我言。上帝好生者再。乃

遣使諭虜。令自歸。乃班師。次榆木川而崩。當是時。內帑以數擊胡。匱士苦騷動。先是。廷臣伏闕下。以死爭。大司農原吉繫掖庭。大司馬賓自縊死。然虜亦以積威大創。不復肆如異時。乃上竟以陟方殂焉。豈不哀哉。洪熙初。賜本雅失里妻。妻母米月五石。會胡中諸酋數相構。戰塞下。款塞言欲降。上有詔。詔大將軍武安侯享。大略言虜多詐。受降如受敵。宜嚴爲備邊。其宣德元年。馬哈木之子脫歡遣使進馬。令嗣父王。其明年。阿魯台。脫歡亦力巴力王歪思。各遣使朝貢。其明年。脫歡歪思。又各遣使朝貢。賜之金綺。加賜歪思弓刀甲冑。其七年九月。阿魯台殺敗兀良哈。遂住牧遼東塞。明年。阿魯台遣使自遼東入貢。上方英武。閑武事。以爲往虜自宣大入。今顧從遼東。此必有以乘我者。詔大將軍備邊。邊益嚴。其九年夏。瓦剌王脫歡攻殺阿魯台。欲領其眾。眾不附。乃求故元苗裔脫脫不花立之。居于漠北。哈喇噲諸虜皆應之。於是脫歡來。上阿魯台捷。且獻前元

玉璽。其九月。阿魯台子阿卜只俺降。上納之。授中府都督。阿魯台部遂亡。瓦剌獨盛。其正統元年。脫歡與其部酋朶兒只伯不服。數仇殺。其二年。脫脫不花來貢馬。其三年。臺御史王驥敗阿台虜於塞下。朶兒只伯走死。其四年五月。虜驟貢馬。其六年冬。脫脫不花及其太師淮王也先遣使者貢馬。賜予可汗。與太師等也先。脫歡子也。其八年。也先及阿魯骨遣人貢馬。是時脫脫不花弱。而也先強盛。乃以其姊妻脫脫不花。因挾脫脫不花竝入貢。得金幣無算。使人皆館京師。逾春始遣還。所過時肆殺略。我往來通事人變詐。出好語。輸我中國虛實也。也先遂因通事人請婚中國。通事人佯應曰諾。已謾之曰。也先喜。已通事人面謾曰。吾爲若奏上。幸報可矣。也先復大喜。自以爲得和親中國。迺誇詡張諸酋。揚揚大自雄也。而朶兒只伯又死。无返顧憂。侵驕不可忍。其十三年十月。上谷將楊洪破阿台部于塞下。其十四年春。遣二千人。大貢馬爲聘。而朝廷曾未知。

之也。詔對。殊無一言半辭。及和親事也。先始大媿恨。其七月。盡發其種落。大入雲中。上谷邊。而會中貴人王振用事。顧自憙。怙中國威重。以爲虜當可以聲勢壓也。佐上親征。大臣皆不得與議。於是公卿皆伏闕上章。章畱中不從。丙戌。命中貴人金瑛。輔邨王宿衛。而上自京師出居庸。過懷來。至上谷。天大風雨。雷鳴。其八月辛酉。師覆於土木。上遂北狩。百官廷劾振罪。振族誅。景皇帝。以皇太后命。卽皇帝位。遙尊上爲太上皇帝。時國遭大變。眾恆索無固志。侍講埒。依天官。倡言當徙都。公卿業有遣家室南避者。獨尙書謙痛哭抗疏。稱引宋南渡事。以爲鑒。而中貴人金瑛亦以謙議爲是。遂寢。其十月。虜復入寇上谷。廣昌。破紫荆關。遂擁上皇南進。薄於都圻。宣言索大臣王直。胡濙。于謙等。詣行在。以觀中國俯仰。於是遣通政使復。中書舍人榮。充九卿。如虜帥。朝上皇。上皇微語曰。彼無善意。宜亟反。是日虜焚長陵。獻陵。景陵殿寢門。遊騎四出。南至於盧溝。廷議欲

鍵九門。清野以老敵。尙書于謙曰。不有戰何以守。於是躬環甲。先將士出。反闔德勝門而軍。示士卒必死。前薄虜。敗之。大將軍石亨。軍彰義門。戰疾力。又敗之。侯孫鐔。王通。中外夾擊。又敗之。虜勢沮。而諸勤王兵以次集。於是謙檄諸路。募番漢軍能禽斬也。先自效者。予萬金。爵上公也。先心內懼。逡遁。而伯顏帖木兒。奉上皇出紫荆關。詔諸將分兵躡虜於清風店。大破之。而遣諸邊將各還鎮。於是都御史沈固。軍上谷。尙書石璞。軍雲中。都御史羅通。都督范廣。軍山西。都督王通。軍天壽山。都御史王竑。軍居庸。起周忱爲司空。鎮撫秣陵。令轉蘇松餉。於是戰守畫大具。而虜使來諭平。方虜圍上谷時。擁上皇。索金幣。約賂至駕歸。偏將軍郭登善戰。守備益力。徇雲中。雲中備亦如之。至都城。虜益以上皇爲質。肆危言譙讓。少保于謙。颺言曰。豈亦未嘗聞夫社稷爲重。君爲輕乎。於是與石亨等引兵疾力戰。發巨礮擊虜。虜死無算。殺其酋長鐵頸元帥。虜始知畱上皇。終

不得大賂。乃以好使。奉上皇迴蹕。還京師。遜居南宮。大赦天下。時景泰元年八月也。是後瓦剌酋知院阿剌。遣使貢馬。請和。賜勅答之。其九月。普化遣皮兒馬黑麻。貢馬。普化。卽脫脫不花也。其明年也。先欲自立爲可汗。數攻普化。且來貢馬。我報之。稱也。先爲瓦剌都總兵答剌罕。太師淮王。大酋長。中書右丞相。其明年春。瓦剌同牟撒來王子。遣使貢馬。是年也。先怨普化。不立其姊子爲太子。而立其庶子。遂攻敗普化。遣使來獻捷。時普化以數十騎遁去也。先盡得其妻子人畜。其十月。又遣使來朝貢馬。且迄命使通往來。下廷議。當是時也。先使每至京。幾千人。往來殺略人畜。益驕橫無忌。虜又東結朶顏。西交哈密。脅引赤斤蒙古。往往窺塞下。言官以爲虜懷窺伺。宜絕勿報使。執政以爲難。下戎部。尙書謙曰。臣職本兵。獨知有兵。脫賊犯順。卽當行天誅。使事。臣不敢知也。制曰。使勿遣。於是勅也。先言太師求報使。一本欲遣。第念往遣報。小人言語短長。傷和好無。

益。故不遣人來。朝貢多乃至三千餘。邊人苦之。邊將請謝絕。朕念太師忠義。姑聽。後少遣。臨遣時。與總目關會。得爲詐冒防。其明年正月。宴瓦剌使臣察占等二千八百七十六人于儀部。勅賜其酋長正副使二十二人。遷都督。都指揮。指揮。千戶等官。賞資金銀幣有差。它皆賞段絹靴帽。至十餘萬。其七月也。先攻敗普化。普化敗奔兀良哈。依沙不丹。沙不丹殺普化也。先聞之。遂聚其族類殺之。前元之裔殲焉。乃自稱大元田盛大克汗。函史稱田盛改元添元。田盛華言天聖也。冒元之稱。實非元裔。是後虜皆瓦剌種矣。事聞。下禮官議。而儀制郎章綸言。可汗在戎狄。則帝者之號。觀其上。唐太宗號爲天可汗。元世祖爲成吉思可汗。可見矣。莫若賜勅。別封爲敬順王。或瓦剌王便。而安遠侯溥給諫林聰。徐正。又言宜稱太師。至禮官會議。則言可汗。乃隋唐來。北狄酋長之通稱。非中國所禁。宜可聽。詔書宜稱爲瓦剌可汗。示羈縻便。其十月也。先遣哈赤。貢馬貂鼠。我以書

報之。竟稱爲瓦剌可汗。其十一月。瓦剌使臣火只爾。阿麻回回。來貢玉石。卻令自售也。先弟賽因孛羅魯王諸酋。竝遣人貢馬。自是之後也。先新立。恐眾不附。欲通好中朝。始不復深入。先是。虜騎屯和林。先也旣稱可汗。乃營于上谷北哈刺莽來之地。而以輕銳屯沙窩。漠南之虜患。蓋自是始也。昌平侯楊洪。請出軍三道討之。與都督俊意同。獨少保謙。以爲虜方奉上皇。駕南遷。討之無名。上竟如謙議。天順初也。先有平章哈刺者。欲繼也。先爲太師也。先不許。因襲敗也。先走死。後哈刺又爲孛來所殺。而立也先之子。爲可汗。始號小王子。小王子也者。諜稱也。先時號普化大王。已小王故也。小王子旣立。無眾。受制於孛來。癰王子亡何。孛來殺小王子。於是營於塞下之涼亭林子。時亦款塞求食。其二年春。孛來。阿羅出。始入河套。安遠侯柳溥禦之。輒敗。其三年八月。胡騎大寇我雲中。直擣鴈門。忻代。殺略亡算。去。復寇我上谷。其五年六月。胡騎入河西。大將軍仇廉

禦之。敗績。遂度河大略。當是時。孛來稍衰。而其大酋毛里孩。阿羅出。孛羅出。猛可少師。與孛來。癰王子。讐殺。而立脫思爲可汗。亦曰小王子。虜中言脫思者。故孛來所殺小王子從兄也。脫思旣立。虜眾小定。而脫思弱。不能制其下。各酋擁兵自便。毛里孩。阿羅出。孛羅出。遂大入河套。然相猜忌。不敢深入爲寇。時亦遣人貢馬。然兩酋必後先接踵於道。恐中國有所左右也。其成化元年二月。彗星見西北。長三丈餘。三閱月乃滅。是時瓦剌太師阿失帖木兒使入貢。由喜峯口入。挾三衛夷與俱。先是。北使入貢。由大同。三衛使從喜峯口。而北使至。賞賚燕勞。類優於他夷。以勝國遺孽故。至是忽自異。部以聞。詔言北使旣混同三衛。直以三衛夷禮禮之。絀其心。虜使恚。有違言。通事人諭之故。上書伏罪。乃遇以故禮如初。於是著爲令。令歲冬農隙時。聽遣使。使毋過三四十人。使從雲中入。頃之。阿羅出。結哈密。北山。旱。西洋部酋。加思蘭。孛來。結其同部酋長毛里孩。各

爲黨。又東通朶顏。而中國被虜若亡命者。爲鄉導。其九月。遂自河套。大入榆林。撫臣項忠。盧祥。任壽敗之。會孛來與毛里孩。忽相仇殺。乃引去。我內邊自是多事矣。已而虜又入我雲中塞。是年。朶加思蘭攻殺阿羅出。併其衆。而結滿魯都。潛號可汗。以朶加思蘭爲太師。入於河套。大轉入雲中。上命撫寧侯行邊。故可汗脫思。不知所終。滿魯都亦瓦剌部酋。或云脫思族。孛羅出。或云卽孛來。其五年秋。朶加思蘭與毛里孩。也烈忽孛羅。大入榆林塞。已入上谷塞。轉寇朔方。遂至於固原。其六年秋七月。阿羅出餘衆寇榆林。撫寧侯擊卻之。其九月。臺御史王越巡邊。敗虜於平崖窯川。又敗之黃草梁。其冬。毛里孩及其別部酋也烈忽寇關中。大將軍劉聚。擊敗也烈忽。餘虜引去。其七年。王越奏乞搜套。復東勝。乃遣侍郎葉盛行邊。上方略。盛不知要領。奏不可。遂寢。其秋。置榆林衛。始葺內垣也。其八年秋七月。撫臣馬文昇。敗虜於黑水口。禽其平章鐵烈孫。斬首數千。其